

Pro Senectute: Premiaziun da las «Istorgias da la vita»

■ (anr) **Gudagnà la concorrenza «Istorgias da la vita» da la Pro Senectute (texts rumantschs) ha Philipp Walther da Champfèr, avant Mengia Caviezel da Ramosch e Robert Fry da Panaduz. Ier ha gi lieu a Cuira la premiaziun da lur texts e da quels tudestgs.**

L'onn 1999 è l'onn da l'ONU per ils umans vegls ed attempads. Durant quest onn ha però vulì far la Pro Senectute dal Grischun anc dapli. «Ozendi collian ins savens la vegliadetgna cun ils cas da gliued veglia, la quala duai vegnir tgirada e ch'è plainamain dependenta da l'agid dals conumans», ha ditg *Flavia Kippele*, la manadra da fatschenta da la Pro Senectute chantunala, «quella vista nun è dentant correcta: Da tut la gliued en l'etad da l'AVS ha mo ina fitg pitschna part basegn da tgrira, probablamain nun èn quai gnanc diesch pertschient.» Ch'els hajan vulì curreger perquai in zic quest fauss purtret e render attent a la vart positiva e creativa da la vegliadetgna. La primavaira han envidà perquai ils respunsabels da la Pro Senectute las senioras ed ils seniors grischuns da scriver texts da circa trais paginas, en ils quals els quintan da lur vita.

Surpris da la gronda participaziun

Ch'els sajan stads surprais cur ch'els hajan survegnì ils texts, declera *Flavia Kippele*: «En tut 103 persunas grischunas, da quelas 17 auturas ed auturs rumantschs, ans han tramess 157 texts. Da decider tgenins texts ch'èn ils megliers nun era propi na uschè simpel.» Ils texts tudestgs èn vegnids partids en trais categorias: «Eveniments extraordinaris, ideas», «Sentiments profunds, vardads» e «Spiert dal temp, pli baud ed ussa». Cunquai ch'er ils participants dal Puschlav e da la Bergiaglia han scrit lur istorgias en tudestg nun haja dà nagina categoria per text talian. A la giuria faschevan part *Alexi Decurtins*, *Brigitta M. Gadiant*, *Maya Hinder-Middendorp* e *Hans Vontobel*. La summa dals premis, la quala deriva da la fundaziun da famiglia Vontobel importa en tut 5000 francs. La Pro Senectute vulesse gugent publicitar ils texts pli tard, en tge furma n'è però anc betg enconuschent.

Tuts han merità in premi

La premiaziun dals texts rumantschs ha prelegì l'anteriur professor e charedactor dal Dicziunari Rumantsch Grischun, *Alexi Decurtins*. Ordavant ha'l

fatg la proposta che las gasettas rumantschas publicgeschian tut ils texts rumantschs. Cun ses raquint «Cur cha duos as dispitentan...», il qual tracta da la mort ed il diavel che sa dispitan per si'olma, ha gudagnà *Victor Stuppan* da Cuira in dals premis. «Ils custavels bons» è l'istorgia – dal rest en rumantsch grischun – da *Toni Berther* da Cuira che quinta dals bons per ir en vacanzas ch'ils uffants regalan a lur geniturs per ch'els possian bandunar ina giada la val. Il terz premi ha survegnì *Robert Fry* da Panaduz per ses raquint «Miu pign paradis», il qual sa chattava davant chasa sissum la Cadi. La segunda, *Mengia Caviezel* da Ramosch, quinta en «L'alosser» da sentiments ed eveniments en la natira, dal temp da giuvna e da dunna. «Langiro» ha num il raquint da *Philip Walther* da Champfèr, en il qual el quinta «Aventüras e lumparias d'ürant il bun temp vegl in mieu bel e cher lö natel» (Silvaplauna). Ch'els texts hajan en sasez tuts merità in premi, ha manegia *Alexi Decurtins*.

Suenter la premiaziun han prelegì tar caffè e petta ils dus scripturs grischuns *Katharina Hess* e *Paul Emanuel Müller* da Cuira differents raquints da lur ovras.